



Sesida dals

Communitgà ils

Protocol nr.

25 d'avrigl 2023

26 d'avrigl 2023

334/2023

### **Dumonda Spagnolatti**

concernent in concept general per sanar la via da la Val Calanca

### **Resposta da la Regenza**

Ina gronda part da la rait da vias chantunalas traversa territoris ch'èn exposts a lavi-  
nas, a crudadas da crappa e da blocca, a boas ed ad ulteriurs process da gravita-  
ziun. Vias da traffic segiras èn pia da gronda impurtanza per il Grischun sco chantun  
da muntogna cun ses abitadis decentralis e cun ses vitgs per part periferics. Las  
stentas da segirar las vias chantunalas cunter privels da la natira cun agid da me-  
siras architectonicas ston dentant sa focussar sin ils secturs fermamain periclitads,  
perquai ch'i na fiss betg pussaivel u fiss sproporziunà da construir stabiliments da  
protecziun e/u da prender mesiras da protecziun sin l'entira rait da vias.

En il rom dal project «Management integral da las ristgas sin via» (MIR-V) vegn  
actualmain fatg in nov giudicament da tut las ristgas relevantas per lung da tut las  
vias chantunalas. Ina basa impurtanta da quest giudicament èn las enconuschien-  
tschas che l'Uffizi da guaud e privels da la natira (UGP) elavura sin basa dals art. 7  
fin 11 da l'Ordinaziun davart il management integral da las ristgas tar privels da la  
natira (OMIR; DG 920.150). En quest giudicament valitescha il UGP las ristgas ed  
eruescha il basegn d'agir a maun da matrizas da finamiras da protecziun. Sa basond  
sin questas basas da privels e da ristgas elavura il UGP ina survista per etablir  
cumbinaziuns pussaivlas da mesiras planisatoricas, biologicas e selviculturalas  
(tenor la Lescha dal guaud).

*Tar la dumonda 1:* La Regenza è conscianta dal privel d'eveniments da la natira en la  
Val Calanca che pon avair consequenzas per la via da la Val Calanca e pia er per la  
segirezza dal traffic. Che quest privel pregiuditgescha il sentiment da segirezza da  
las abitantas e dals abitants da la Val Calanca, è chapaivel. La sfida d'identifitgar a  
temp ils privels da la natira e da prender a temp las mesiras da protecziun adequatas  
è creschida durant ils ultims onns, quai betg sco ultim sut l'aspect da la midada dal  
clima. Ella vegn ad occupar il chantun er en l'avegnir.

*Tar la dumonda 2:* Da princip stoi vegnir menziunà, ch'i vegnan registrads tut ils eveniments da crudadas da blocca e da grippa en il cataster dals eveniments da la natira (StorMe). Quai permetta d'identifitgar midadas, per exempel in augment dals eveniments chaschunads da privels da la natira.

Partind dal giudicament da las ristgas da l'onn 2008/2009 concernent crudadas da blocca e da crappa sin il traject tranter la punt artgada sur la Calancasca fin la galleria Segheria Buseno, vegn la ristga actuala giuditgada da nov en consequenza da la crudada da grippa en il sectur Revetell. I vegn analisà, sch'ils lieus da privel enconuschents èn sa midads e sche novs lieus da privel èn sa furmads. Ultra da quai vegni eruì, sch'i ha dà ina midada da las ristgas, per exempel pervia d'in augment da la frequenza dals eveniments. En connex cun il giudicament da las ristgas vegnan resguardadas er las limitas che l'Uffizi federal d'ambient (UFAM) prescriba per la ristga individuala da mort. Las analisas vegnan ad esser terminadas la stad 2023. Sche la limita da ristga duess vegnir surpassada, vegnan examinadas mesiras.

I sto anc vegnir rendì attent, ch'il territori cumpiglià da las eventualas crudadas da grippa en la Val Calanca è vast, e ch'igl è nunpussaivel d'identifitgar ordavant tut ils lieus da privel, malgrà las analisas accuratas e voluminusas.

*Tar la dumonda 3:* Là, nua ch'i existan ristgas pli grondas, vegnan consideradas differentas mesiras. Ultra da la surveglianza periodica dal lieu da privel po vegnir fatga ina intervenziun cun purtar davent u cun sigliantar las massas da grippa instabilas. Tut tenor la situaziun poi vegnir prendì en consideraziun da construir ovras da protecziun (raits cunter crudadas da crappa, rempars da protecziun, gallerias u tunnels). Eventualmain poi er daventar necessari da spustar la via chantunala, sco che quai è vegnì fatg al sidvest da Selma. Pervia da las analisas currentas na pon anc vegnir fatgas naginas explicaziuns pertutgant projects concrets per augmentar la segirezza dal traffic.



En num da la Regenza

Il president:

Il chancelier:

Peter Peyer

Daniel Spadin